

Hubentud den Movecion

Skirbi pa Mercedes Abdul

Preciosidad di espectaculo pa celebra 20 aña di Pierewietje y Flash!

Pa: Mercedes Abdul!

Cu creacion di universo y tur loke e ta encera Dios a kibra cu e scuridad y silencio interminable cu mester a existi prome cu El a traha e mundo. Pa realza e naturaleza Dios a traha e ser humano, diferente na e otro criaturanan, y a dote di gran sensibilidad.

Posiblemente e prome hende cu a surgi riba tera lo a keda maraviya y hipnotiza cu e espectaculo di ensueño cu el a haya su dilanti: montaña, pahra di tur sorto, mata y bestianan exotico, flornan multicolor, rionan, lama profundo, e solo briyante, en fin, un beyeza impresionante den dia, y den anochinan e cielo cu su brindis di strea.

Ta facil pa imagina nos mes cu for di e contemplacion aki, di su prome encuentro cu mundo riba un escenario magico, e ser humano a cumenza vibra di emocion y a trata di expresa esaki di diferente manera, y for di eynan a nace loke awendia nos ta yama ARTE.

Melodia: musica, canto y movimentonan corporal (baile) tambe ta desprende di e intento aya di e prome ser humano pa transmiti su emocion como parti di e creacion Divino.

Dia 4 mingo ultimo, tabata un inenso placer pa Seccion Hubentud den Movecion di por a cubri, y sinta y disfruta

di un tremendo espectaculo yen di melodia, movimiento, color, creatividad, y sensibilidad humano.

Ta trata di e celebracion di 20 aña di existencia di Grupo Pierewietje y Flash, na Cas di Cultura, cual ultimo funcion tabata riba diadomingo.

No cabe duda cu hubentud di Aruba tin talento, y cu a base di bon guia profesional nan capacidad artistico no conoce limite. Asina grandioso ta e show presenta pa Pierewietje, Mini Flash, Flash, y Ex-mini Flash hunto cu e ex-integrante di Pierewietje Eveline Yarzagaray.

E publico tabata sensacional tambe, unda tur hende a laga e artistanan sinti con orguyoso nos tabata, sinta den e Sala di Cultura, disfrutando di un presentacion di calidad sumamente halto, comparable cu e shownan di mas bunita cu nos por admira den television, door di hobennan di otro paisnan.

Un precioso show pa cual, pa su magnitud y profesionalismo, bunita vestuario, pa su frescura, luz y color, ta merece di worde yama: EXCELENTE!

Masha pabien na tur esnan cu tabata e motor tras di e show aki, y sigur na Martha Figaroa y su streanan cu tambe ta engrandece Aruba su universo artistico.

Un espacio pa PRIEBEB:

CON JUFFROUW LILITH RASMIJN TA INCULCA BALORNAN DEN SU ALUMNONAN



Ta falta mas of menos 4 siman pa aña escolar 97/98 finaliza, y cu esaki tambe PRIEBEB ta yega na culminacion di su tema di aña "Ban Crea un School cu Cuido y Cariño pa Otro: Esaki ta e Curazon di Innovacion" cu a tuma un aña di atencion na schoolnan basico. Manera ta conoci caba e tema di aña 98-99 ta: "Con pa crea un comunidad cu cuido y cariño pa nos muchanan".

DIARIO tambe ta cera su ciclo di entrevistanan cu cabesante y maestronan di school riba e prome tema cu dos entrevista realiza na St. Michael School. E prome tabata cu Juffrouw Lilith Rasmijn, ken tin e alumnonan di Tweede Klas na su encargo. E cu su muchanan a pone den practica e lema di e siguiente manera:

"Den mi clas e aña aki, aunke nos tabata tin cierto dificultad pa motibo cu nos a muda debi cu nos school tabata den reconstruccion, for di principio di aña mi a forma gruponan cu temanan cu ta trata cuido y cariño pa otro".

Asina Juffrouw Lilith a parti su alumnonan den e gruponan: responsabilidad, respet, cariño, amor, cuido, famia, disciplina.

"Nan sa kico e tema: -Ban crea un school cu cuido y cariño pa otro- ta encera y kico cada balor menciona ta nifica.

Mi a splica nan pakico mester tin responsabilidad, respet riba cual mi a elabora mas, ya cu respet entre e muchanan di awendia ta hopi abao, loke no ta nan falta pasobra cu nan ta producto di nan comunidad. Mi ta purba mediante e muchanan alcanza nan mayornan door di siña nan e respet cu mester tin pa otro, riba propiedad di otro".

Tambe Juffrouw Lilith a siña nan riba respet pa bida en general, respet pa naturaleza; esta, flora y fauna cu ta algo hopi grandi pa e maestra aki ta masha amante di tur bestia, pero specialmente cacho.

"Mi ta haya cu diferente Arubiano ta un poco brusco; tin cu ta maltrata nan yiu, nan bestia nan ta maltrata, nan grandinan nan ta tira nan den cas di anciano te dia nan muri. Esaki ta cosnan cu mi mes a mira", Juff.Rasmijn a señala, y pesey e ta purba di inculca den su alumnonan amor y respet pa bida en general y tolerancia.

"Ta claro cu mester tin un limite unda bo por biba cu otro. E ta dificil pa bo haci esaki cu mucha chiquito pero bo mester purba di baha completamente te nan nivel, ya cu nan no tin nocion di cosnan pero nan ta producto di comunidad".

E sistema aki no a nace cu e tema di Priebep ya cu Juffrouw Lilith y su coleganan semper a haci esaki caba, pero sin dune un nomber specifico. School ta mira esaki como parti di educacion. E sistema di inculca e balornan di bida lo sigui na school doblemente conciente. Segun e juffrouw e resultadonan ta hopi positivo y e muchanan ta refleha esaki den nan comportacion na school y na cas, y e mayornan mes a ripara cu nan yiunan a bira mas conciente di con pa ser un mehor persona cada dia.

Riba potret Juffrouw Lilith Rasmijn cu su alumnonan di 2de klas.

PEPSI



PA GENERACION DI FUTURO

TELEFONNAN DI DIARIO

826747- FAX 828551